

Pisinermit inatsisip nutarterneqarnissaanut, imaluunniit pisap Kalaallit Nunaannut nuunneqarnissaanik, taamatullu nammineq malittarisassiuussisinnaalernissamik siunertaqartumik Naalakkersuisut danskit naalagaaffiannut saaffiginneqqullugit peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Naaja Nathanielsen, Inuit Ataqatigiit)

Akissuteqaat

(Inuusutissarsiornermut Aatsitassanullu Naalakkersuisoq)

Siullermeerneqarnera

Aallarniutigalugu Inatsisartunut ilaasortaq Naaja Nathanielsen, Inuit Ataqatigiit, aalajangiiffigisassatut siunnersuuteqarneranut qutsavigerusuppara. Pisinermit inatsit taama pingaaruteqartigisoq oqallisigissallugu Naalakkersuisut kajumerilluarpaat. Pisinermit inatsisip niuertut pisisartullu akunnerminni pisinnaatitaafiinik qularnaarisuuvoq, kiisalu pisinermit tunisaqarnermilu inatsisitigut niueqatigiinnermi toqqissisimasumik tatigeqatigiinnermillu pilersitsisarpoq, ataavartumik pigisanik niueqatigiinneq eqqaassanngikkaanni.

Pisinermit inatsit maanna atuuttoq 1906-imeersoq sioqqullugu nunat avannarliit ataatsimoorullugu inatsisisamik piareersaateqarput annertuumik, ukiuni arlalinni ingerlasumik, niueqatigisartakkat niueqatiginerusat akornanni paasinartumik ataqatigiissumillu inatsiseqarnissaanik qularnaarinnittussamik. Pisinermit inatsit maanna atuuttoq ukiut 104-t matuma siornatulli ataasiakkaanik allannguinerit eqqaassanngikkaanni suli atuuppoq, nunanilu avannarlerni tamani atuuttuulluni. Piffissap ingerlanerani allannguutit takkussuussimasut atuisartut politikikkut suliniuteqarnerinut pisariaqarsimapput, soorunami aamma Kalaallit Nunaanni atuutilersinneqartariaqarlutik.

Pigisanik inatsisitigut tunngasortai pillugit aaqqiissutit ataatsimoortut maanna Naalagaaffiup Ombudsmandeqarfiani nutserisarfimmi nutserlugit ingerlanneqarput, tamakkununga ilaallutik pisinermit inatsisip allannguutai nutaajunerusut, atuisutut isumaqatigiissut pillugu inatsit, ilaatigut internetsikkut pisinermit peqqissimisinnaanermut pisinnaatitaaffiit aamma erniaat pillugit inatsit. Qularnanngitsumik 2010-mi UKA-mit saqqummiunneqartussanngorlugu naammassineqassaaq. Siunnersuut tunngavigalugu pisinermit inatsit atuisartunut politikkimut nutarterneqassaaq, malittarisassallu nutaat iluarsineqarnissaat qulakkeerneqassalluni, nunat suleqatiginerusartakkatta tungaannut assingunerusumik siunertaqartinneqassallutik.

Naalakkersuisut inatsisip ataatsimoortup saqqummiunneqarnissaanut, atuisunik tunngaviusumik qulakkeerinnittussaq, pigisaqarnermullu inatsisitigut sammisoq

oqallisigineqarnissaat qilanaaraat, kiisalu nunat avannarliit ataatsimoorussamik inatsisigut suliniutit aqputigalugit qanoq ilisukkut inatsisitigut pitsaasumik suleqatigiinnissap atatiinnarneqarnissaa qilanaaralugu.

Tamatumunnga ilutigitillugu Naalackersuisut suliniutigissamaarpat, Pisineq pillugu Inatsisip nunatsinnut nuunneqarsinnaananut periarfissat paasiniassallugit, taamaattumillu inassutigerusullugu aappasaarinninnissaq 2010-mi UKA-mi ataatsimiinissamut kinguartinneqassasoq.